

Meeqqat kommunip ulluunerani paaqqinnittarfiutaaniinnerinut kommunillu aaqqissugaanik ulluunerani angerlarsimaffimmi paaqqinniffinniinnerinut akiliuteqartitsisarneq pillugu apeqquteqaat aallaavigalugu oqallittoqarnissaanik siunnersuut.

(Inatsisartunut ilaasortaq Isak Hammond, Inuit Ataqatigiit)

Meeqquvinnititsisarnerni angajoqqaat akiliutigisartagaasa sumi najugaqarneq apeqqutaalluni assigiinnginnerujussuisa qanoq iliornikkut aaqqiivigineqarsinnaanissaat pillugu apeqquteqaat aallaavigalugu oqallinnissamik siunnersuut.

(Inatsisartuni ilaasortaq Karl Lyberth, Siumut)

Akissuteqaat

(Ilinniartitaanermut Ilisimatuisarnermullu Naalakkersuisoq)

Siullermeerneqarnera.

Inatsisartunut ilaasortat Isak Hammond aamma Karl Lyberth kommuni ulluunerani neqeroorutinut akit qanorlu iliornikkut assigiinngissutsit aaqqiivigineqarsinnaanerat pillugu apeqquteqaat aallaavigalugu oqallisissiamik siunnersuuteqarput.

Aallaqqaasiullugu Naalakkersuisut malugeqqaat inatsisit atuuttut tunngavigalugit, meeqqat kommunini ulluunerani neqeroorutiniinnerinut akit, kommunit ulluunerani neqerooruteqarnermut aningaasartuutaat akiliisussallu aningaasaqarnikkut atugarisaat aallaavigalugit aalajangersarneqartussaammata. Akiliutip kommunit aningaasartuutaat tunngavigalugit naatsorsorneqartarnerata nassataraa, ingerlassat kommunit aningaasartuutaannut ilaatinneqartut ulluuneranilu neqeroorutit toqqaannartumik pissusissamisuginnartumillu imminnut attuumassuteqassammata.

Akiliutissaq aammattaaq aalajangerneqartarpoq Meeqqanut suli atualingitsunut perorsaanikkut inerikkiartuutaasumik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaat nr. 3, 4. februar 2011-meersoq tunngavigalugu aalajangersarneqartarpoq. Nalunaarummi isertitat qaffakkiartorneri pillugit skalaqarpoq, tamannalu akiliutissat inaarutaasumik aalajangersarnerinut tunuliaqutaasarluni, taamatullu kommunit namminersornerat tunngavigalugu kommunit ataasiakkaat sullissinissamik annertussisissaannik aalajangersaanagerat aallaaviusarluni, tak. Kommunit aqunneqarnerat pillugu Inatsisartut inatsisaat nr. 22, 18. november 2010-meersoq.

Oqaatigineqassaaq kommunit sullissinissamik qanoq annertutiginissaannik aalajangersaasarnerat akileraarutit annertussisissaannik aalajangersaasoqartarneranut attuumassuteqarmat, ilutigisaanillu oqaatigineqassalluni kommunit ataasiakkaat ulluunerani neqeroorutinut aningaasartuutit ilannguttagaasa suussusaat kommunimiit kommunimut nikerarsinnaammata.

Tamatumunnga atatillugu Naalakkersuisunit oqaatigineqassaaq meeqqanut paaqqinnittarfeqarnermut tunngatillugu kommuneni tamani naammattunik meeqqanut paaqqinnittarfeqarlernissaa anguniartariaqartoq, tassa taamaaliornikkut angajoqqaat akuerisaanngitsunik ilinniarsimanngitsunillu paarsissussarsiortariaqalartarnerat pinngit-

soorneqarsinnaammat. Tamatuma aammattaaq kingunerisissaavaa soorlu assersuutigalugu Danmarkimi ilinniarnermik naammassinneqqammersut Nunatsinnit suliffissarsior-nissaannut pilerisunnerulernerat.

Taamaammat ataatsimoortumik tapit aqputigalugit imaluunniit meeqperiivit ataasiakkaat Nunatta Karsianiit toqqaannartumik tapiiffiginerisigut akiliutinik aaqiiniarneq imminermini nassatarissavaa assigiinngitsunik aaqiissuteqarneq, kommunit ataasiakkaat meeqqanut suli atualinngitsunut ulluunerani neqeroorutitut aningaasartuutinik naatsorsuisarnerannut naleqqiullugu.

Kisiannili meeqqanut paaqqinnittarfinnut aningaasartuutit kommunit namminneq aningaasatigut pilersaarutaasa iluannit akilerneqartassapput, tassanilu angajoqqaat akiliuteqartarnerat ilaareerpoq. Annikinnerusumik akiliuteqartitsisarneq kissaatigigaanni tamatutumunnga aningaasartuutissat sinneri kommunemit, allatigut sipaarniuteqarnikkut, imaluunniit akileraarutitigut qaffaanikkut akilerneqartassapput. Tamannali Akileraartarnikkut Atugarissaatrnikkullu Ataatsimiititaliarsuup akileraartarnermut tunngatillugu iluasaqqinnermut innersuutigisaanut annertuumut naleqersuutissaaq.

Taamaammat sinaakkutissatut atuuttut iluanni kommunit namminneq akiliutissanik aalajangersaasarnerat pillugu inatsisiliorneq kommunit namminersornerannut akuliunnermut sanilliunneqarsinnaavoq. Taamaammat Naalakkersuisut isumaqarput, atuisut akiliuteqartarnerisa annertussusissaat sumiiffinni ataasiakkaani tamat oqartussaaqataanerannut isumagisassanngortittariaqartoq.

Taama oqaaseqarlunga oqallinneq oqaaseqartartunut ataasiakkaanut tunniuppara.